

M038: Bote, Der heimliche

- 0,1 [ich] [bin] ein heimlich bote
0,2 nû bevilhe ich daz gote .
0,3 daz er daz lâze [werden]
0,4 [dazz] ich sol werben .
0,5 daz sol ich biten alle tage
0,6 got lâze ez werden âne schaden .
0,7 [der] [mich] ze boten hât gesant
0,8 [er] ist vile wîtenân erkant
0,9 der heizet mich daz sehen
0,10 vile minnicliche jehen .
0,11 er heizet si ire gemüete des hûeten .
0,12 daz si ire gemüete .
0,13 iergen gewende .
0,14 decheinen . ende .
0,15 an decheinen sôgetân man .
0,16 der si geminnen niene kan .
0,17 des minne sint niet heimlich .
0,18 [ezz] en dunket in lobelich .
0,19 si sulen sich dar gewenden .
0,20 dâ man si kan geminnen
0,21 [dazz] [dunket] [in] der vrouwen rât .
0,22 nû sich wie hier geschriben stât .
0,23 ich hân gesehen manigen man
0,24 [der] [anders] [minnen] niene kan .
0,25 wan daz er wænet diu wîp .
0,26 minnen sînen starken lîp .
0,27 sô wænet [aber] [ein] [ander]
0,28 der ein teil ist langer .
0,29 danne ein ander man .
0,30 daz er die minne sule hân .
0,31 einer [durh] [sîne] schoene
0,32 der ander durch sîne küene .
0,33 der dritte durch sîn guotez hâr .
0,34 si sint betrogen [dazz] [ist] [wâr]
0,35 einer durch sîn mankraft .
0,36 der ander durch sîn rîtärschaft .
0,37 daz si dâ heizent . [rîtärschaft]
0,38 daz ist [ein] michel ungemach .

0,39 si tuont den vrouwen leide .
0,40 daz si selten sint dâ heime .
0,41 si rîten zuo wîge .
0,42 waz vromet daz den wîben .
0,43 ouch vlîzent si sich an turnei .
0,44 die vrouwen dorften niut ein [ei]
0,45 geben umbe sôgetâne hûbischheit .
0,46 diu zuo minnen niet en stêt .
0,47 den wole minnenten [mann]
0,48 den kan ich wole erkennen .
0,49 wande uns – saget ein buoch .
0,50 von guoter minnen genuoc .
0,51 iz sprichet “swer sô guotlîche lebe .
0,52 unde wizze wole alle pfede .
0,53 – der sol den vrouwen liep wesen”
0,54 dâ vûrebaz en sagen ich iu niet
0,55 waz mir dâr umbe kûnde ist .
0,56 wan ze guoten minnen hoeret [list]
0,57 der man sol dienen mit diemûete .
0,58 allen den die ez merken ze guote .
0,59 unde halte die [mit] sinne .
0,60 die mit valschlîchen dîngen .
0,61 boese rede breiten .
0,62 die halte er mit listicheite .
0,63 nû ist maniger dem daz wirret .
0,64 daz in sîn armuot irret .
0,65 daz er niet mac vollebringen .
0,66 sînen willen an manigen dîngen .
0,67 alse er doch gerne tæte .
0,68 der tuo alse ich ime hier râte .
0,69 bedecke sîn armuote .
0,70 mit vuoge unde mit güete .
0,71 unde sî in alle wîs gereit
0,72 ze mêren sîn vrûmicheit .
0,73 boese site sol er vermîden .
0,74 und en ruoche umbe in dâr nîden .
0,75 sîne boese nâchgebûre .
0,76 swaz er tugende mac gevüeren .
0,77 die üebe er naht unde tac .
0,78 unde swenne er ez niet getuon mac .
0,79 sô bescheine er guoten willen doch .
0,80 her zuo sol er haben noch .
0,81 schoene antwürte unde guote grûeze .
0,82 wîse rede unde süeze .
0,83 unde werbe daz mit sinne .
0,84 daz in alliu diu werelt minne .
0,85 unde man ime wole spreche .
0,86 unde nieman an ime en reche .

0,87 necheinen übelen willen
0,88 weder überlût noch stille .
0,89 alle tugende die üebe er gerne .
0,90 des en touc im niet ze entberne .
0,91 wande iz der werelte wole gezimet .
0,92 swenne man daz vernimet .
0,93 wanne man ez reden hoeret .
0,94 sô ist der nît gar zerstoeret .
0,95 den man dâ vore wider in truoc .
0,96 des haben wir vernomen genuoc .
0,97 daz vile manic man
0,98 tugent unde êre alsus gewan .
0,99 swer diz tuot alse ich ime râte .
0,100 sô ist sîn êr grüene unde stæte .